



大谷山堂集卷四

建業門人嚴長明編

謝山夢麟文子



登樓行陝州使院作

七月流火疾弗瘳十日不上西南樓
今晨風色清且柔
憑欄聊作凌風游
樓中几榻窓戶幽
樓外巒壑縈沙洲
中條條欵雲氣收
萬尖突兀撐高秋
寒樹依微辨平陸
炊烟點點微波浮
黃河一線東方流
抱城北走寒悠悠
誰家挂席乘扁舟
流烟落日不可留
雲山緜渺生遠愁
夢魂昨夜歸蘆溝
歲聿云莫心百憂
今我不樂日月道
當風一嘯翻輕鷗

晨游雞距山

上有河上公舊宅

東裝河上游杖策雞距頂逶紆沿青山空林踏人影平
野開天光蓬門闕深景清響振寒葉晨暉散西嶺雨霽
松色深風肅荷衣冷延迴挹高蹈空冥認烟艇悵懷鸞
鶴羣索居發深省

發陝過魏野草堂作

晨出城東門策馬初曙光微徑入層麓厥巔留孤堂夾
道多喬柯石磴緣高岡雲構面峭崿竹榭紛琳琅秋色
落平野草木涵清蒼圓沙起寒雁平楚暄浮陽巖居既
深阻松風何悲涼君子貴用世道蘊形亦歲理閱懷抱
熟跡與鷗鴻翔循蒼辨井竈彷彿清風長攀林酌杯酒
感激銜中腸

早發硤石

客愁如飄蓬隨風遍秋草飭服羣鷄鳴驅馬荒山道宿
霧眩猶積殘月悽已顛露湛枯英明徑白空巖曉沿轉
眄平阡惆悵獨飛鳥無乃非故枝踟躕出林杪出林亦
何之游子中如擣忽憶密縫衣臨風黯懷抱

古詩二首寄都中知己

步上城東臺蒼莽孤烟多長風吹輕雲倏忽離山阿西
望多蒼山北顧臨大河長空蔽昏景巨水揚洪波去者
自不息日落當如何我欲喚古人話此中心瘥古人不
我作涕下襟滂沱

富不須金玉貴不須王侯匹馬謁親戚杯酒歡朋儔而

我獨何為浪跡南雲陬日暮臨高臺千里黃塵浮微茫
辨井邑奔走連墳邱舉首望故鄉落日風鳴啾高者為
山岳下者為川流那將一寸心抱此終古憂好識在鄉
樂日月其未遒

題陳髯畫松障子

陰庭白日生精怪炎天六月氣清快急雨驚從古壁翻
陰飈欲撼檐牙壞恍惚天都峰已到峩嶶山迴溪絕磴
氣颯沓長空謾謾耳畔仿佛奔驚泉髯也畫松不畫貌
冥搜遐騫窺天奧意象雷驚電晦時凌空挂出蒼龍倒
凝精閉戶二十日松濤驟起髯落筆淋漓潑墨風雨疾
橫榦直榦真氣出霜株離立色慘慄精芒四達鬼神入

目斷晴崖晝霧昏魂驚素壁空堂失下枝拂苔石上枝
擎蒼穹大枝勢倔強特立烟濛濛孫枝破擺噓迴風吐
軒磅礴意凜冽陰森直欲無真松髯也招我來東堂沉
冥卓午烟蒼茫好勤愛護秘什襲或恐雷公下取掀重
墻况值朱陽暘熱遍行旅安得持此蔭庇一洗煩溽歸
清涼越禽代馬嗟殊向不見髯翁對髯障雨濕奚囊意
屢淒風迴角枕神空王若耶溪水香爐峰知君處處扶
青筇好將赤縣滄洲趣來寫塵埃冰雪胸

新安坑卒行

嗚呼人世殺機真慘絕二十萬衆喪倉卒黃泉無路排
重閹煩冤鬱屈天為赤祖龍何許歸沙邱義旗爰舉東

諸侯誰提鐵騎揮長矛風雲指顧炯兩眸指揮萬卒聲
鳴啾陰氛晦日寒天愁風吹碧血生秋草荒郊呼嘯達
昏曉君王自有函谷關何與新婚共垂老長安砧杵萬
家聲準量腰帶為誰好前年力盡阿房宮今晨骨暴新
安道九原愧見趙將軍肝膽平原任懷抱塵霾晝起黃
雲開長林叟叫孤鴻飛高冠使者弘農來日落駐馬相
衰徂新安城頭暮吹角青燐點點秋風哀草冷孤城氣
肅肅魂兮歸來不可觸不見長平坂汾河曲寒雨荒榛
黯平陸夜深狐兔竄深蒿鳴鳴舊鬼秋衢哭

龍門

龍門形勝天下奇面嵩俯洛中貫伊呀然兩關森角圭

每以風雨為合離連山欲暝雲封之朱樓突兀青峰基
松毛石髮相倒垂蒼麟萬本蟠之而如龍出淵半歲霧
時露指爪頭角遺西巖石洞鑿者誰班班刻畫紛蛟螭
蠻君鬼伯熊羆資前驅虎豹驅與狸或瞠目視豐兩頤
一燈孤炯懸琉璃長衣侍者低雙眉如笑如慕如深思
造福乃復暴民力婦人之見良足嗤

洞為魏太后
作功德造

感此太息

一長嘯半空響峇巘谷隨畫船簫管不可期撞鐘伐鼓
相娛嬉鏗鉤澗壑萬霆怒山靈恍惚翻雲旗誰分玉鏡
澄階墀千珠跳擲紛漣漪動蕩窓戶搖緹帷山巔一亭
最孤絕攀捫蘿葛中忘疲對唯石徑何逶迤花宮雲磴
留清颼高秋萬態簇蒼媚丹樓紫閣青空披山水暎帶

乃復獲真趣去一坐失天然姿始知造物位置得天巧
俗手點綴能爾為去年 仙躡曾駐此顧眄草木周恩
私至今 御榻時行殿夜深神物煩護持我来瞻拜隨
鳧驚欲雨不雨天氣迷作歌恐遂驚采鷁矯首北望神
先馳

香山寺

行藥來東巘蓮宇締遐慕閒隨沙上鷗識此松間路捫
蘿怯遥磴履石眄前渡延景餘奢忱尋異無停顧薜荔
縈朱門遂果幽勝趣置窓山翠鑿就石危欄住寒空媚
雲景適與孤鳥遇靄靄山外烟離離山下樹無心與之
遭悠然得良晤叠嶂開遥青長河澹晚素余懷修已殫

目成意先赴迴憶塵市喧頗窘幽人步慨慷聞鐘聲松
桂空山暮

香山晚坐

秋晚珠閣涼青山澹將夕復此巖上佳披襟坐溪石歸
雲拂空林翳然翳餘碧美人何時還娟娟秋水隔勞者
徒為歡去矣將何適飛葉響寒山臨流悵行客

夜自賓陽洞歸宿香山

暮山迢遞濃雲合良夜維舟傍清峽停橈覓路濕螢飛
西巖鐘響東巘峇東巘曛黑門應閉晚雨空濛濕衣袂
天寒夜寂松風吟閃閃燈光射窓際敲門拂面嚴霜重
遥知童僕各成夢黑甜一枕不知尋却趁寒宵踏巘洞

是間清絕誰主人烟霞餐飽知何用入戶打火佛燈紅
遠聞石齒號驚風繩牀一覺睡初熟醒來獨聽寒山鐘

雨後泥濘夜半赴偃師作歌

日之夕矣嵐氣昏長衢雨作波濤翻旋渦起伏路崩壞
平渠叫鬧鳴蛙喧衆星韜匿萬樹黑山逕犖确濃雲屯
余也策馬東南奔泥沒馬腹馬意怯鞭之欲動愁翻掀
陵巒入眼眩深黑長途舉足資攀援朝食未舉更入夜
饑腸鳴叫徒相捫計程半日到頗易蒼天一雨遂使跬
步膠輪轉傳聞昨日雨最大波傾浪滾如翻盆我時攜
伴宿伊闕山烟漁火開金樽雲山繇邈我心悅傾壘一
洗塵囂煩今雨舊雨本無異險艱歷盡憂思繁倏忽翻
覆那可料世間萬事難重論君不見長河夜吼驚三門
狂瀾噴薄勢可吞天昏雨激應更聞繞牀啓戶夜恍惚
矯首一乞蒼天恩

時河決陽武堤工未竣

晴赴鞏縣作

積雨增羈枕蕭辰悵冥晦奔走泥活活襟履動沾穢今
晨一何佳空宇乍清淬四野舒澄暉林原麗蓂續鮮新
秋氣出豁達雲翳退日涌披遙丹烟銷露遐黛俯仰延
天光適與嵩高對巘岫轟蒼峭雲物忽破碎離披萬樹
錯岌業一峯背排遣驅宿悰流覽及新態始知秋宇空
舉目了無礙跋馬心悠然風塵謝流輩

黑石渡

坡陀兩崖斷嶄絕一峯轟徑石疊深墨鏗鉤動車軸長
河乍北轉迴巒忽東逐川流靜澹池巖木鬱森肅暎空
泉石迴拂馬松柏禿迴顧嵩高山罨藹波上綠秋色從
西來蒼茫入函谷是時秋雨餘萬象出新沐空宇淨如
拭芳蕙藉文韞危葉雜鮮麗燦比朝繡簇烟起樹若冪
雲歸岫疑複及此風日佳輪蹄忘碌碌問渡立夕陽人
語驚鷗宿

鞏縣夜起

時代有變易客愁無古今披衣坐清夜肅肅堂廡深開
軒滅明燭華月懸高林皓露忽已零微風驚棲禽旅鴈
何方來叫雲悲我忱連行過東北無乃非鄉音客遙乏

近想慮集渺信心已怯樓上笛復此風中砧含情歲云
晏恐遂霜雪侵

虎牢

層阜排秋障雄關逼虎牢馬驚行棧窄雲出斷崖高海
日明朝岫林風撼夜濤洛東三百里險絕是成臯

廣武原

秋高廣武原日落斷雲奔天地一龍鬪風塵千里昏平
砂生朔氣殘壘駐征魂撥馬尋遺跡荒郊戰骨存

風穴寺

夕日下空翠晚烟沉薜蘿涼風動松竹秋思空山多人
影散林隙經聲流澗阿那堪同落木拄頰一蹉跎

今年別

前年別淚填臆卷舌入喉啼不得上有白髮母下有扶
病室忍啼作笑笑無力出門三日不能食今年別苦復
苦出門無憀入門無主不見我母送我但見兒女盈前
淚下如雨我無母憶我無旅爾無母憐爾無所提携保
抱恃爾父去誰與慎寒暑爾伯爾叔善覩女嗚呼前
年別啼不得今年別哭無力

出郭

結鞞發京縣控轡臨廣衢石梁何迢迢盡此往者塗微
颺動修樾濃蔭周桑榆林罅辨城闕曠望延神都車輪
一以徂音塵日以踈浮雲何時來胡以明區區裴徊瞻
短策聊復留須臾日落愁不見感此中煩紆

湖梁

客愁本無際觸境彌生悲睠茲去路長曾不殊昔時昔
來何閒閒王軫相威遲方舟厲清淺並駕牽華滋今我
獨何事疲馬秋風吹修楊夾廣津岫影凌清陂即目憶
前歷履舊牽悲思沉憂一何長鬱屈不可持水逝寧復
迴葉落難上枝死者悵已矣生者長淒其

七夕飲酒

素彩流虛檐澄輝鑒踈牖今夕復何夕悵望嗟誰友仰
視雲漢斜露下忽已久一水長迢迢會面亦云偶相思
不相見母乃多所負懷哉天涯人使我顏色醜憶君君

不知聊復飲醇酒令節而喜懽庶以永予壽誰能效
女獨坐空搔首

白溝

客念頗不適晚風生夕波長天隔秋浦勞者意如何此
夜戍樓月虛堂應共多裴徊憐遠影相憶一蹉跎

月夜與王二坐任陘舍

圓靈麗斜漢檐影澄新陰寥天豁軒霽坐此嘉樹林清
颼若良醫相顧聊披襟林端露已落砌下蛩復吟如何
值佳夕而弗歡同心澹澹絳河直靄靄浮雲侵即事獲
良晤寓目情已深沉憂亦云昔浩歌良復今何當携濁
酒共醉無絃琴

登河間驛樓眺矚

曠望延秋暉愁心亘天末浮雲帶遙空流烟遞明滅天
清遠樹微地迴荒坳濶遙望畿南山似可辨毫髮引領
披黃塵彷彿見城闕我懷豈不殫無翼安可越况復悲
風多殊響鳴清樾白日爾淹留慎勿原上沒俯仰凝青
矚離禽去超忽

暮至阜城作

雲歸日西匿夕氣迷孤城招搖帶長薄蕭節愁予情拂
衣遵暮垣浙瀝淒颼生塘清夜林窈月隱平沙明依依
眷清暇迢迢念徂征丹雘謝秋榦朱實辭春榮榮落亦
有常奄忽嗟時更懷哉東堂華燦燦羅繁英應有憶遠

人翹首秋雲輕

過廣川瞻矚觸懷

頽垣轟霄霓塔影凌空蒼霜飛不到地日日秋塵黃浮
陽靜寒郭朔氣湧大荒輕颭吹行雲南北東西翔人生
會有適何必皆故鄉浮埃幾變滅四顧墟烟長我憂從
中來所悲非滄桑狐死歸首邱此意猶可忘日落西山
阿烈士為之傷

晚趨德州行大堤上

輕策行長堤日夕林鳥亂空靄澹晚暘波光動遙岼出
沒眺寒堞依微隔叢灌時見數舟行容與孤城畔軋軋
櫓聲出冉冉鳧羣散烟末塗已即林際逕猶轉佇立望

蒼茫含情歲云晏

荏平曉發

朝發荏平郭勞人曙啓關烟沉天末樹秋入客中山節
易憐鄉遠雲行較我閒踟躕愁欲絕流水莫潺湲

東阿道中

征路不可極千峰繞客軒山迴郟子邑天斷魯連村落
日川原靜秋林鳥雀喧孤城兼暮色俛仰總銷魂

中元舊縣驛夜歌二首

長河在南斗在北叢樹無人月深黑破柵殘扉不滿百
夜昏漑酒家家哭獨客聞之黯無色欲見邱隴那可得
四年此節在異國但見他人供酒食孤兒何曾在親側

靈不見我應歎息生不能歎祭遠適父母生我亦何益
去年南頓月之日白六來聞我母卒驚迴淚斷哭無聲
仰睇皇天白日失倉卒翻疑前月書書上平安誰所筆
憐兒或恐兒心傷兒歸更繞何人膝瀕危知復欲云何
未親含殮憑誰說歸來一慟兒今還呼天不應心如割
朝來漿酒陳應同楸梧肅肅生靈風五子羅立獨不見
靈魂應到東阿東

我妻嫁我十年半十日啼饑九無飯苦憶嚴冬一破裳
嫁我鬻盡供炊爨年餘飽煖抵幾何奄歎銷沉魂已斷
肝摧隱痛彌留時腸牽兒女淚被面流連知爾意無限
到頭何日重泉見月來數女知何如淒飈淅瀝吹裳裾
朝携祭榼綠青蕪秋墳呼母母則無覓爺中夜聲嗚嗚

項王墓下作二首

陵闕咸陽變君王尚有墳起緣殺卿子死亦伏諸軍朔
氣生殘碣秋郊駐斷雲慟君思戰事拄策立斜曛
霸上胡妨釋東歸亦可休如何返翁媪遂使失鴻溝一
馬嗟公賜千金湯若酬傷哉時不利涕下野花秋

棘城

驅車入亂山朝日翠微間寒澗不成響孤雲殊自閑天
明秋草色客老壯夫顏聊可遲予步沉吟碧水灣

東平

嶄然山忽住寒郭見東平積水生晨霧層烟繞郡城天

隨羣嶂斷風逐亂雲征蠶尾嗟何處蒼林面面橫

夜宿高橋

庭樹響忽振天涯知己秋檐端數螢沒檻外一星流雨
氣寒生枕鐘聲遠到樓鳴蛙莫喧聒征客未停騶

饑烏行

饑烏朝饑啼啞啞踉蹌下啄田間麻麻乾無子食不得
從風入息西家室西家顆粒溢倉積陳因零落散堦砌
老公呼鷄鷄啄粒喜鵲楂楂下來食饑烏啓喙鼓我翼
兜童見之怒顏色拾瓦打鳥不許喫不許喫循墻飛鷄
鳴鵲噪誰同我饑我無子哺逐我何為烏啼非憂鵲非
喜此身作鳥豈得已

王將軍行過汶上彥章祠墓作

太原城頭千老鴉東飛大漠啼黃沙晉陽王子子勝父
捧矢告廟拔刀舞十萬健兒猛如虎日出河心插大鼓
鼓聲闐闐朝入雲大梁夜遣王將軍將軍意氣一何勇
揮戈叱天天欲動十盪十決當者誰朝趨鄆濮來援稀
雲浮萬騎闕來追衰徊駕馬空鳴哀與皇帝戰十年哉
梁唐朝暮生焉為不為我用爰斬之如公之死死豈多
為朱三死如公何

東郡道中雜詠十四首

凌晨車馬去閑閑掩冉村炊列岫間黃石青松各無主
斷雲零落穀城山

二十封章迥不聞可憐衰草被秋墳
爲肩火色誰相識
拄頰寒原哭馬君

下筆君王自有神才分八斗語何新
芝田寂寞微波冷
蕭瑟憑誰賦感甄

征輶輾輾復班班一棹空明苻藻閑
日暮雲駟更何處
晚烟涼露冷魚山

迢遞青岑暮靄橫晚風浙瀝喚愁生
斷蛩寒葉秋無數
不耐空山更梵聲

東樓何處古城隅有客銜杯歎逝駒
桂檝沙棠意無限
夕波明滅蜀山湖

日暮風吹杜甫臺荒城孤嶂夕陽開
石門烟澹秋無色
潦倒誰傾濁酒盃

獨客秋心滿綠蕪波光曬影過中都
違山十里音猶在
支枕殘陽聽蟋蟀

畫堞霜濃宿草荒歸然誰識魯靈光
南樓一曲蒼林晚
古道入稀禾黍黃

籃輿朝發雨冥冥外蒼巖儼畫屏
沙淨溪寒襟袖潤
鬚眉都帶嶧山青

青山萬點迥含愁處處寒沙漲淺流行
近界河將百渡
濕雲草草不成秋

嶧山送我將百里澹靄朝嵐儼碧紗
却試筍輿入滕縣
寒郊寂歷舊時花

日暮來過古薛城笑君彈鋏亦多情窟成兔自娛安枕
誰與先生說令名

白鷺輕鷗隊隊還遠峰如黛碧波間行人跋馬綠湖去
直到彭門總是山

彭門懷古放歌

黃河之水來向東破天萬里趨朝宗呂梁欲下汴泗合
彭門突兀當其衝千牛萬杵夜霆激亂峰攢掣蒼天窮
重河疊障接樓櫓當年建樹驚雄風阿房一炬蜀道絕
庀材聿起彭城宮歸來錦衣炫清晝丈夫如此亦已豐
指麾將卒裂疆土飛揚不復憂關中崩摧山嶽氣何震
嚴城夜報咸陽烽泗上亭長那可信一杯猶願分其公

鴻溝以西作誑語片言直欲欺童蒙拔山蓋世雖不逝
虞兮數語傷心胸亡我者天帝天授負非爾罪成非功
楚山日落大河哭徒令終古天懔懔寄奴織屢一無賴
飲酒博塞殊凡庸時來邁會學揖讓蹈襲前軌將無同
中原陸沉仗戎馬揚鞭徒倚秋空虹九日崇臺作公讌
一時賓從驚猶龍謝公仙去孔令死濁濤萬載聲撞春
抗懷興廢數行下誰能更憶張建封巖疆坐鎮乏奇績
乃緣婢妾傳其踪閨房塗抹亦細事悼歎女子非英雄
毬塲千步半管蒯縱橫險句煩誰攻城上高樓孰所建
玉局仙吏我媚翁一麾出守過梁宗登樓作賦聲摩空
儋耳惡屬不得死天教指爪留鴻蹤日暮靈風動軒檻

夜長寒笛疑相逢我未三十意刺促踟躕陳蹟心則忡
跋馬南馳二十日秋高獨挂長天篷後無來者古不見
塵烟霧靄相冥濛扣舷獨立莽蕭瑟驚砂坐振翻孤蓬
作歌長嘯去如矢風生颿脚驚飛鴻

輿人哭

輿人迸淚悲嗚嗚嗟呀喘喙鼓隤胡舌乾口燥哭路隅
爾獨何事中煩紆輿人仰頭答欲語聲僂喑自言祖父
曾攻儒孤兒生苦身無襦行賈收瓜販齊楚兄嫂不可
與同居去年報名銅山縣負戴趨走事良慣日分五十
青銅錢夫頭月給銀兩半前擡官府經淮南出無一月
錢滿串北關租草屋費我三百文勉強取隣女約畧囊

橐營衣裙出門日無幾聞說家遭水妻在水聲中宛轉
隨波死所住一間半至今在泥裏昨日縣帖下說道官
今來驛吏備馬匹縣吏呼輿擡一班十二人聚集相儕
排平日喫公食如何臨事逃官差天明發銅山午至桃
山驛不道五十里里泥深沒腰膝足下著菲登頓滑
赤脚肉痛畏傾仄泥深尚可休觸石泥深沒我身觸石
傷我骨骨傷思平那可獲父母生我骨與肉如何狼籍
任瓦礫前日擡官來聽道徃江西彼時雨雖落大道猶
平夷今日擡官去言徃江南澣那知步步難舉動皆辛
楚回首我家亦何許我足如刺良復苦應官我足無完
膚退後無錢我腹何由果不怨行路難但願蒼天莫下

連宵雨此去新豐鋪道里尚三十官路一尺泥一尺泥
中有石脚難入欲歸不能行不得與人爾勿哭爾不見
頽雲壓首沉西北大如山色如墨電光閃爍射汝孔亟
殷殷震雷在汝脊

符離

天漏憑誰補傷心更此都奔濤動樓櫓大漠半江湖獨
客側身久寒空淡照無雨師吾語汝飄泊滿征途

早赴滁州道上作

露下野色清寒山澹方曙我途入重岡空林散殘霧稍
稍朝旭上習習晨飈度時見巖際雲或被烟中路霜徑
屢曲盤槿籬自交互村邇睖已在塗迴辨斯誤纖翠遠
樹沉薄彩鮮霞附空碧媚杳靄川原紛散布舒眺瞻清
流輿徒指歸鷺

清流關

朝食大柳驛午過清流關絕壁亘積鐵磴道何曲盤重
門構山楸危閣凌層巒入覺觀聽失出訝人世寬回首
望閭闔咄哉不可攀萬木鳴天風颯颯空山寒澗響琴
筑集岬怪刀掣攢砂石白皜皜檜柏青丸丸崩岫藤葛
絡孤篠雲物環驚輪呌石齒疲馬貪深湍陟險氣每攝
攬勝神屢殫緬懷藝祖烈駐馬歌桓桓

臨江樓

亦知非故土扶杖且登樓落日萬古色長江千里秋浮

雲蔽吳楚朔氣老邊幽牛馬吾何敢憑欄起暮愁

樓中晚眺

薄暮登崇樓曠望招天風烟江靜暝色坐聽江南鐘白
日半欲下殷雷胡鼙鼙倏忽雲氣上乍失鍾阜容稍辨
幕府山變滅餘微蹤懸知淮上舟秋雨鳴孤蓬西眄何
迢迢餘霞暎澄空晴光媚孤嶼遠影兼飛鴻咫尺異明
晦感懷今昔同

短歌行試院中秋與王芥子薩原菴飲酒作

君出瑪璃之盤玻璃斗我歌短歌侑君酒君非主者我
非賓明月於人不可負庚午之歲使桂林伏波巖下余
行吟蠻烟瘴霧發孤嘯山月肅肅鳴饑禽前年此節讌
伊闕漁火金罇坐寒月就中去歲不可道荒郊夜哭霜
林槁今夕何夕六江澣滅燭開筵夜擊鼓明月照我亦
照汝世間何地非行旅但須盡此杯中歡不須對酒懷
鄉關我歌短歌意非瑣君不見東西南北三年我

趙文敏天山射獵圖為曹來殷作

生不識醫無閭夢不到狼居胥壯哉此樂吾不圖非苗
非獮非春蒐用桓
玄事祁連水草枯畢辜黃沙獵獵彫夫須驚
毛亂點山糝糊雄狐跳梁招短狐黃羊觸突黃蒿居粉
蕨籜經矜獬羴後有從者麀麇麇麇鹿麇鹿朋相呼麇
兔八竅追貊羴犇眾却走狼跋胡鷄鷄翬鷩鷩紅錦襦有
鷩其羽走者豬陸原絡澤山作郭毛群合還供翦屠帷

車幔盖嗟非夫其來者誰形睢盱斑斕纓帽黃短鬚綠
睛鶻突不可摹繡旂雙揭紛前驅峰盤逕轉有入無孤
塗葉護寒高旗黑貂繁飾花檐榆爛編辮髮編羊珠虎
皮絳繚鞞不約忘歸右挿左控弧九花朝秣貪龍芻脫
柑嚼齒驕不舒蕃奴周擁何紛拏九區騰蹴馳滿隅如
拘如怒相友于一一健者非白徒曼胡颯纏紆丹朱右
肱左啓張兩孟按節弗假金罇釘翻身盤馬各騁殊張
皇不暇成圈模紅腥血洗金鑊鐔飛者走者殪者徂提
肩電掃風翻蒲監腦啐血潛嗜膚獠獠鷹背氣猛麤重
鏢掣斷風頭趨圪喉折頰如摧枯投置觸矢號呀呀鷹
遮犬喉拋其孥肩霞挂兔歡極娛血甜如露毛可茹六
甲無事張行厨雪清白酪羊凝酥醴漿一氣翻百觚酒
酣逕倒罰賓揄三孫點筆哀哉踈過江白鴈啼西烏山
川灑淚愁吳姝冬青夢冷秋風菰蠶絲烟篆炳不渝作
詩一笑飛急符壯心直過崑崙墟

大谷山堂集卷四

門人青浦王昶上海張熙純趙文哲嘉定曹仁虎同訂

華亭門人王鼎恭騰寫

大谷山堂集卷五

建業門人嚴長明編

舟行將赴永濟寺

謝山夢麟文子



朝上石城橋揚舫及晨旭孤篷上初日款乃寒城曲露
集秋樹明葉下空波綠稍覺畫堞轉漸覲朝嵐復晴江
淨遠色荒烟澹老屋沿洄近青山斜風散寒鷺

永濟寺

籃輿就深烟古寺入脩竹山光澄我心復此窻戶綠松
雨墮殘滴清響在空谷隱隱西日斜漸沒巖下屋坐聞
幽鳥音眷此山間宿

登燕子磯曠望大江

危磯盡天地獨立悲風多落日送大江萬里明顏波四
顧何茫茫孤鳥飛江沱川原接杳靄秋色來岷峨西望
峩眉山奔濤胡坡陲遙思大海東萬代同此過來者固
未已逝者將奈何我懷在古人但見山與河誰當識予
意淚落空山阿

觀音閣

登陟興弗盡復此探窮險危構出山罅厥下凌深坎門
檻不藉地壞木撐重广短椽插巖竇石骨坐雕鑿岫缺
孤宇出閣矗傍崖礮或恐山骨裂重以鐵鎖擘鏢動閣
亦動天風虛冉冉捫磴怯昏黑黝雲深黯黯怪禽啼一
聲林木振餘慘耳目忽開豁長江蔽葭茨洶波蕩欲墮
陰飈噓可撼始至况無藉久佇咋不敢登歷慣矯捷對
此趾忽歛足動蹋虛牖谷響吁可感未飢攬勝興頗墜
羈人膽緣念初地遊江濤日吞噉濤蝕山亦危况此山
隙檻探竒侈滕遊我行豈足範舒嘯徵孤踪履險誌予
慊

與諸公夜臨後湖觀水獵歌

白日已落湖氣微月出未出烟霏霏呼集官船艤沙嘴
舉杓張罟臨遙磯舳艫銜尾六十隻卸颿靜聽吾指麾
當風吹角衆艘動師出以律無敢違夜天黯黯眩昏黑
以燈置船匿者稀周陸數澤舸泛泛拋罟斷岸光依依
繁星落水萬燈亂影無上下皆如緋張篷四列畫若罨

尋朋緩逐圓成圍周迴開闔盡變態使船如馬茲庶幾
須臾獵較試身手游儵潑刺魴鯉肥小魚吐沫受以盎
大魚穿頸啣之鞮見者千衆歎竒絕觀獵於夜聞亦希
使君校獵不在得以魚恤衆籌其饑舉盆負甕笑童稚
汙流被面腥沾衣流連溺志古所戒樂民之樂君無讖
但使游眺恤窮隱吾從吾好誰敢非喚集漁師散網罟
樓頭鼓作吾當歸

六朝松石歌

銅駝夜哭東門麻金仙涕出悲恒沙青山閱盡故無恙
但有萬古澄江霞紫筠花石旋淪喪况從典午奔天車
新林故府麗江甸妙諦祇記呼蘭奢美人狎客遞灰盡

瓊樹不見朝朝花景陽紅井剩苔砌青溪晝噪官蝦蟇
有眼不識張壯武誰從瓦礫區龍蝦瓦官故圃蔚古澤
入園狂叫驚麀麇龍鱗剝盡山骨裂雲根不動青虬拏
天風夜半墮仙粒虎頭袍笏香朝衙眼中大兒謝安石
東山翠蓋勞相遮匏笙謾奏簷角猶為六季芟淫哇
靈氣鬱曲作鑿玉鮮斑駁蝕穿豁訝干福醜石入汴嶽
律此奚止十倍加擬封定許拜幾品從大夫後聊肩差
紹興元祐更陳蹟刺畫底事籠蟬紗直可雁行漢時柏
豈惟免葦壺中華江左衣冠幾塵土天寶錫汝生無涯
寒潮直過名士渡玉鈎猶掛官人斜蘇仙化鶴對清夜
江山灑淚悲元嘉蘭成江關慟戎馬誰假夢筆流滂葩

大石山堂集卷一
掃苔倚樹眷虛籟胡牀便擬支清淮叶人生安得如汝
壽電光幾見雷停擗歸當蠟屐斷桃竹彈琴石畔聽琵琶

鷄鳴寺

眷茲白下秋稅鞅鷄鳴寺淨域臨古城坐此巖下翠殘
露滿空林鳥動時一墜層軒傍松杪寒濤瀉平地烟影
暮江辨晚日澄湖媚兀坐對青山翠羽數雙至

翠微亭

細逕欲五里箭栝縈所經危嶠拭孤翠林杪瞻茲亭竹
刷青鸞尾樹墮玄鶴翎松闕晝肅肅虛牖風泠泠地僻
鷄犬幽恍惚臨仙庭靜括霄霓氣遠列川嶽形風平一
江白日沒千里青烟起估客泊天澹飛鴻汀慨焉慕閒
寂遂色倏已暝何當契初志車蓋時此停

木末亭

秋岑帶重城雲構出修樾夜來微雨過吾懷於此豁晚
色明遙林夕陽猶未沒渺渺空波微颯颯曾風發遙辨
沙上舟烟際數帆歇閒聽長干鐘披襟坐超忽

登長干浮圖絕頂放歌

脫我薜荔之衣切雲之冠翱翔何必凌霜翰賈勇直上
二千尺微軀運造青雲端雲端獵獵秋風酸欲墮不墮
身蹒跚我足蹠蹠衣翩翩天乎天乎吾其仙彷彿來雙
童乘風騎紫鸞招我游太虛下見萬里之波濤千里之

關山閨風元圃置眼前奔流東去何時還城郭良是人
變遷但見秋暉日日懸不見昔人顏再丹王氣無復生
紫巒鱗鱗萬室長江干下則背城一逝之洪波上則萬
古不歇之飛烟波動烟移坐變滅瑤枝壁月歌空殘昨
夜微霜金井闌長謠霜曉朝秋天余冠岌岌凌天關天
關不開天風寒七星在戶如彈丸羲和鞭日敲琅玕中
有仙人奏管絃紅羅綺組紆當筵流光何術永爾年顧
我不答空長歎道逢兩黃雀引我迴長安長安何許雲
湯湯雲漫漫兮不可攀立而望之摧心肝

登清涼山絕頂展眺放歌

騎黿我昔遨平羗宦游直過蕭丹陽送江入海半天下

鯨魚夜吼翻枯腸獨搴紅桂歷蠻嶠敦牂秋駕天南檣
洞庭八月湖水濶望衡九面颿隨湘夜吹鐵遂卧黃鶴
玉衡迸落饑蛟藏君山曳屐望烟水海門蜃氣浮坳塘
青衫恨不過湓浦倒騎白鹿嬉廬匡滄波浩淼望不極
來從卷石窺齊梁迴巒絕磴隱松櫟空巖琴筑敲風篁
笠簷絕特俯飛鳥奔渾萬里荒江荒鞞紋綵縹魚尾赤
天吳戲作玻璃光風景不殊百感集置身空濶吁茫茫
戮力王室支半壁山頭幕府淪滄桑卞公蛻去太傅死
石麟壞道眠苔槍老臣無罪腹畫的華林血裏青泥坊
跣足天子下殿走捨身不救蒼生瘡臨春碎見擒虎入
好將金粉圖南唐結綺望仙梗管蒯石欄紅淚留啼妝

華園曲沼不可見翠微終古摩青蒼角圭雁齒辨天闕
新亭晚日空波涼英雄豎子盡黃土天半且倒崑崙觴
鄂公毛髮露英爽將軍塵柄摧琳琅江山如此更公等
作捍豈僅長城長我雖碑兀類病馬酒酣潑墨殊軒昂
闌干醉拍動五嶽天地獨許詩人狂濯足或恐碎鮫室
振衣聊可凌松岡雪泥踏遍印鴻爪騰蹴八極如康莊
惶恐喜歡亦泡影不須扼腕零丁洋當風一笑擲盃起
寒宵去促桓公裝

悲泥塗

北征十日吾幾頓千里泥淤土無寸舊雨未乾新雨落
淫霖悞我吁可恨深沒腰膝淺脚踝泥中瓦礫蠹如刃

前者顛仆後叫呼所向活活添吾悶自晨徂昏僅五十
黃夜戒途車脫鞞紅心驛南四十里顏雲蔽天星斗暈
紆途避陷忘南北野昏不辨村遠近輿徒叟叫行不得
我欲撻之氣屢奮撻非其罪人何堪麾鞭去汝跨吾駿
我馬步健奴馬瘠健者虺隤瘠不進疾走之能汝何往
吾鞭屢折足空趁嗚呼所邁非良途騾裹駑駘同一困
範不以道曰無材不堪駕馭誰其信驛卒告我兩兩月
平疇潦積無卑峻江北稻田誤收割雨淋稻偃恣蹂躪
不晴十日稻生芽縱有所收穫亦僅夏蝗繞過秋發水
吾民何術禦饑饉况聞徐州河決口淮揚之災不可問
昨朝已截江東漕不足益以川湖運此時天子正憂

勞豈堪更報上江賑我行登頓亦何害蒼天何以慰堯
舜嗚呼蒼天何以慰堯舜明朝攬鏡看予鬢

哀臨淮

嗚呼怪事吾不圖臨淮城上淮水趨崩濤直下城郭無
沆漭巨澤菰與蒲七月廿日吾在途月再閱乃成沮洳
城頭鼓棹平地如不知下有田舍廬縣官俟我城南隅
我叩其略聲淚枯淮流欲入洪澤湖湖水逆淮淮倒驅
夜乘厥勢來吾郭洶濤驟湧人叫呼夫逃子逐牽其孥
坐拋屋宇羣負嶠或處之野跣而跌于巢則烏山則癯
皇天弗憐爾其荼有室而沒田而瀦細流入括倉廩儲
巨流橫灌牛羊徂官凡三夜遷厥居今之住者氓之逋

北風中人金僕姑于野誰恤衣無襦昨計丁戶來十都
倉穀坐沒償之銖千落萬落悲饑烏貧者富者同嗚嗚
嗟哉不救啜與舖坐無擘畫痊爾痛願官好恤無母雛
天實鑒此非彼辜民不堪命吁可虞中丞今夜來其蘇

河決行

癸酉秋九月河決銅山東小店汎麟時司試江南
過茲壤情態目擊作是詩紀

天子紆策促使憂悴民命也

嗚呼咄咄鼓隴胡黃河之水點滴無嗚呼黃河萬里之
水曷得點滴無巨防溜決南東徂乃使故道鬱塞泥沙
淤宿靈虹泗濁濤激擊聲洶呼小店東不一里河身坐

見馳突驪駟駒驪駟駒馳過河河中飛黃埃 皇帝陛下
痛觸徐方災前遣大司寇旋遣大司馬賜之驛騎勿
許休息連夜來屬以十從事駱驛就塗罔間風雨雷傳
聞 宮中昏旦聲擘畫凡百卿士其以所獲投銅階茅
檐部屋塵 宸慮披圖覽奏 天心日月相周迴徐州
水衝突物料無所求 皇帝爰命河東之臣協濟毋逗
遛河東大吏各各率屬來邊州中丞司馬尚須迅發無
羈留汝則知我 陛下日抱蒼生憂道逢老翁哭山徑
悲言何人為殺黃流性老翁老翁爾不見廟堂吁咈
宸衷勞九年之堯無此聖嗚呼九年之堯無此聖女曹
何患無性命老翁罷哭涕在頤插翎數騎東南馳

重出都門行

行邁返旬日欵復脂我車我車何班班日暮城之隅雙
輪逐去塵奄忽離中衢兄弟近我行相顧聊斯須兄馬
亦踟躕弟馬亦踟躕語君勿踟躕去去不可俱形骸異
鄉縣同氣情豈殊南山有雙禽北山有群鳥何獨辭故
枝感歎悲區區

兄弟相送至盧溝返

送者聯鑣旋兄弟棄我去林隙辨歸人時見一回顧佇
立瞻長橋猶是見君處層城隔暮烟楚雨暗寒渡賤子
一寸心長江千里霧何當為輕塵冉冉京華路

新城作

終風凍天地行子何時歸驚砂揚高原日夕我馬饑白
日落大荒黯淡餘孤暉哀雁汝何適當暮後旅稀驚風
傷汝骨飛雪沾汝肌層冰田無梁誰復憐孤飛晝寒夜
復長毛羽安能肥麾鞭我手僵望遠我目迷不如還故
鄉慰此歲暮悲

瀛海道中

孤曜馳大漠四極涵蒼烟林開括遥野俯仰延長天仲
冬萬木凋落葉飛我前河朔多悲風日暮哀烏鳶孤蓬
離其根條忽天與泉枝葉得勿痛同氣情所牽哀哉春
萱暉逝我不復旋隕涕暎孤鳥搖落誠獨憐

月下投平原

涼月白如許靜者今若何以予悵望懷識彼憂情多形
體異疆域遠意無關河忤情眷遥影大地同婆娑澄輝
耿遐鑒所照寧或訛殘雲曳太空宿鳥移高柯彌深去
矣悲誰識勞者歌停鞭締幽意不見中蹉跎

暮赴齊河作

暮節歎鄉迴屢客知途艱豈必悵遐遠嗟此行路難時
序固有終賤子何無還還復遠行游際茲芳歲闌積雪
耿寒月斷雲沉晚山行客悵新別居人思故顏何當聚
昆弟日暮吾掩關

謁岱廟

五帝鎮維秩上公靈威仰主者岱宗元君闢宮朝旭曠

雷公雷碾鬼跳躡維空洞天靈神叢降婁玄枵青煒融
媪神孕育發物蒙豉動喙息足隴墮拆甲達勾槁以丰
帝曰俞汝諧汝功錫以蒼壁帝所鍾賜之大國邦于東
蓬兮三千厥治豐厥配曰恒華衡嵩若侯伯子男以後
惟天帝孫爵最崇青旗壁節其乘驄蒼蚪駕車駮維熊
拘束魑魅夔魍同召鬼歛魄抽秘封號詔遐怪奔群兇
蚩尤飛廉伺於墉布旗敷潤汝竭忠以活有萬弼帝躬
殷鞞丁甲營厥宮八神夜守青芙蓉帝臨巖威肅心胸
歎海欲漠體儷穹闔陰雲陽中建盅鏡天負地開鴻濛
博大不可以物窮天扉神咫精寸通珠旒芝盖凌天風
羣靈趨走同協恭但佐靈雨承尊雄欬吸巨浸曜日容
帝居厥頂雲斷中堯羅綿現神秘蹤燔柴望秩于帝宏
瘞以琮璧禱以瓏夜烏出水波沸搯澎湃大海如巨春
動蕩絕壁青乍紅天門崒崒車折轆糾紛松櫪石理縱
白騾楷檣嘻勿逢疲驢載塗策以節嚴尊構接予惕衷
陽輪照曜山忽彤高穹掃滌烟霏空天憐遷客車馬息
驅除蔽塞開其矇粉墻角鬥雲腫臃弗禱以獲中則冲
擬薦酒脯招僕童王程迫促禽在置載見于廟酌惠隆
神詔我前憐其痾前驅虎豹後逐狨周行惠我戒勿慵
願假神力敷神工沾濡萬族休疲瘞王郎健筆工治攻
我和之若筵撞鐘鑿空出險心力忡哀吟自午昏不終
樓頭大鼓驚鼙鼙

明堂 泰山下

錫宇輯瑞土姓蕃五位式序天王尊歲二月東省元元
靈氛望秩祭薦燔俞汝東后奉笑言維日之吉予泣軒
乃詔班輸營之原經陽緯陰靈據坤宏規究竒景測瞰
重軒兮墀研以躡爰省厥方皇闢門蚩尤息警神肅闔
觚稜曜暘雲麗旛鸞旂翠旌風拂翻蒲牢靈鼉於哉論
炎炎爛爛於嘒嘒震震肅肅愉温温爰憇天門息沸喧
朱燎爚燭揚於垣載見辟王厥貢璫進反登降足接踵
汝齊與魯皆世婚汝滕薛曹為弟昆各協予治勿衆寬
女慶女讓予女掄啓扉臨峻朝布霧激日納光肅陰昏
帝怙厥德嚴威存命神守宇鬼四巡之而宛延飈吐吞

枝撐高穹穿厚垠穹碑巨植陰霧繁均堂壞壁雲煜煜
鬱何壘壘奏蒿焄肅忱攝荒營心鬼恍惚古帝垂佩紳
追溯幽漠精眊昏維王者德流勿湮敬聞日馭回辰春
精貫溟滓靈怪奔古壁十六地貢琛大小平銳式擬信
宛婢蚪蚪文云云金鴉夜翥騰赤輪掃除霧靄披鮮新
帝答天貺神欣欣維東諸侯來駿奔衝牙璫戛朱履屯
但勅行殿羅虎賁比聞欵塞降烏孫畏稜渥惠來重藩
帝閱於邊闔澤敷雄關洞達招其羣拜跪進止頭如黿
膽踰辨髮皮其禪腭反趾錯厥目暖鞠臄頓首卷肘跟
怙恩丕休澤暨昆月正元日其來紛戎夷蠻狄氏羌渾
曷弗黜堊開華園再新榱桷鴻高騫宸斧陞戟陳壘鞬

撞鐘伐鼓吹麓壘受萬邦賀羅瑤琨收攝異類隨鸞鶴
德紹 祖德恩天恩九圍式廓榮道根

整陽夜大風雪歌

山風吹山山夜號雷碾霄霓奔崩濤地軸挫折鳴巨鰲
攫拏老樹鴉雀逃夜入萬族掀蓬茅砂礫旋舞雪疾作
鷲毛萬片如手落東鄰墻塌西叫呼夜半搶攘聲勢惡
雪片轉粗風轉急長空叫嘯坤輪裂倉卒真同海水翻
敲鏗時見簷瓦擲毋乃下民干風伯不然行者丁奇劫
冬盡知無雨雹來夜昏疑有鬼神入雙扉翕歛塞無力
僮僕凋喪婦走匿嬌兒顧我意惶惑孽祛呱呱傍爺泣
嗟乎兒泣尚可休無衣之人何以活君不見銅山縣東
四十里築堤十日工方起呼集丁壯諧汝聲下埽日僅
尺與咫手僵脚凍埽不穩眼見千夫萬夫死我乞天神
願神已此風莫入黃河水嗚呼此風莫入黃河水

晚行沂上

古原遲落日一逕入林邱老樹墮殘雪孤村聞叱牛頗
憐行客倦兼愛茅檐幽旦夕好眠食吾行何所求

沂州

杖策過沂水荒城大漠孤日懸霜野淨鳥入亂烟無獨
客憐嬌女殘陽感壯夫咄哉看老馬與爾正長途

蘭山傳舍走筆和壁上用韓昌黎山石韻

馳曜墮地陽力微敲門打火鴉雀飛尖風如刀面如割

觸之安得肌膚肥殘秋歸自大江許袖羅珠貝遺者稀
帝曰女諧女復往有士弗獲如爾饑留鄉十夕秣吾
馬月乙卯日辭黃扉衝颶南下二千里襟沾泥漬冠縈
霏岱宗偏側盡岡阜如星之共城之圍犖確雖易斷車
軸喜鮮浮沆來吾衣東西南北數年慣本無拘縛何韉
鞬投筆一笑吾就枕短檐啞啞驚禽歸

觸目行

宿遷桃源土不毛清河而下皆洪濤高寶村戶半坍塌
存者墻趾庭生蒿下河東望浩無際積潦乃與天爭遙
聞昔少伯堤壩決埽落不敵天吳驕湖漲沒河河倒閘
中間弗辨橫堤高眼見田廬肆衝突不別貧富齊飄搖

淮揚所屬作數澤一任河伯恣貪饕田禾漂蕩倉廩沒
妻卧竈下夫出逃洪澤水溢億已甚黃流况乃乘其凋
目下雖覺漸平落尚存餘漲迴霜郊前已截漕四十萬
川湖米石來輕舫 皇仁佇見浹萬室廟堂擘畫中常
焦我昨試竣歸謁 帝諮諏纖屑綜鎔豪芻莠剖析念
蓬戶感頰知厯 天心勞披敝干語動深愧禦水無術
臣鬱陶 聖衷憂惻有如此當軸何以生衡茅天灾原
非力可塞人事須慰哀鴻曹仁恩如海民弗及費而不
惠空嗷嗷豈必官吏肆吞噉偏全極次分纖毫我歷徐
淮逮高寶幸無民蠹來喧囂坐知大吏善籌畫斯事奚
必余代庖但念灾黎恤生命觸目未免中切切敢因所

見道余意作歌聊當陳風謠

舟行朝次淮上

水宿如安居夢回聞盪槳披衣適偶然
寒帷得心賞晨霧迷清淮輕風動烏榜
仰辨孤旭昇稍見朝霞上荒墟沉濕烟
汀樹發寒響園野涵青蒼空水資滉瀟
迢遞來漁謳兀坐懷吾黨

晚次維揚

燈火麗華甸繁星動高閣孤棹轉寒流
晚下蕪城郭草沒雷塘煙秋老平山約
暗水明層樓繁華不可作不見昔人悲
但聞生者樂一枝聊棲巢萬貫勝騎鶴
得酒且歡喜後此誰斟酌既歎哀人生
迴風聚寒籜

瓜步

渚禽喧蘆洲遙汀曠清曙就枕猶蕪城
夢醒忽瓜步白霧靜空江殘星墮寒戍
孤岳明浮嵐霜鐘斷晨渡日上京口雲
月落廣陵樹平生眷遐曠即事展良晤
扁舟聊泝洄江山自朝暮不見昔游人
暫向烟中住

大風渡江

輕舟泝大江東望何滔滔遙空壓烟水
白日忽已高飛閣麗層闕竦峙瞻金焦
霜飈吹驚波萬派聲嗷嘈洶濤肆蕩涵
風水相呼號悵望擴胸臆安危隨所遭
凌險豁竒觀快意歸吾曹窮經老戶牖
遜彼鄉里豪偃蹇終恒途不若乘風濤

渡江望金山放歌

我行五嶽歷其四翠巘丹屏湧平地茲山窟宅誰經營
竦峙波心炫金翠朝江暮江濤不窮珠宮梵宇江當中
晨暉夕秀光磨銅面面寫出青芙蓉芙蓉蒼翠丹樓紅
香烟澹沲紆輕虹穹崖羅植皆喬松萬蘿下垂驚魚龍
霧鬢螺髻黛色濃晞髮朝入馮夷宮鏡中一一如其容
丹黃紫翠窺覘同玉盤夜挂澂江空驪珠點滴莓苔封
昨日今日天風生波紋如穀縱而橫飄搖石筍如欲行
飛甍動盪僧徒驚玉皇之吏來神京翱翔寥廓下太清
卧吹簫管聲沉冥蛟龍雜遝紛吾迎江神出沒鞭長鯨
濤頭打山山不平繡栴雕楹渾相傾金光磨盪波層層
崇臺玉闕交迴縈咄哉所覩真不恒方壺圓嶠得未曾
得非浮邱洪崖所經住夜拔海島飛來成鷺鷥鷓鴣輕
雲輕鶴鶴白鳥相飛鳴毋乃王喬之所乘招搖名嶽遨
滄溟不然恐是遼東丁學仙得仙游仙薨塚中郭景純
遺蛻留空名蓬萊瑤草千回榮鱗波終古環飛楹靈妃
不見余長征雲梯萬丈誰能登蜉蝣龜鶴隨所經吾生
不化愁吾情何年折桂凌紫庭雙眸洗滌須中冷

京口待潮繫舟北固山下

水國多晝陰輕霏散空宇維舟候暮潮孤帆落前渚北
風生薄寒青山動孤渚天盡海門烟雁下蘆洲雨殘霧
滿空江卧聽舟人語

北固絕頂眺望

鐵甕城高落木荒支筇北顧一迴腸天容帶雨連空沒
日氣沉波到海黃客足祇今歸汗漫江聲終古慟興亡
傷心龍虎皆銷歇薄暮風吹鬢有霜

夕泊梁谿

柔艣緣歸流卸帆及清晝遠色忽已暝霜空吐寒宿漸
失烟中村稍轉林間岫斷岬靜芳塵披襟擘夕秀微風
遠鐘得片月孤篷就即目懷佳人間情付醇酎

舟中望惠山

暄陽暖晴波眺矚邁清晏林際浮虛嵐空翠落芳甸薄
霏靜復作輕彩動猶絢晴輝遍墟落草木豁菁蕓烟濃
黛岫重峰斷孤雲戀斜光散夕麗鼓薄餘霞倩澹靄乍
迴合紫綠忽開變日落懷山樵曠望如可見微尚儻獲
敦好及維舟便

卜居西齋

旅塗倦三陟弭節欣幽居覲此閑房清悠然得我廬羅
戶徑窈窕映基花扶蘇寒楸澹晚風可以讀我書竹苞
脫葱蒨池影涵空虛日暮天色佳披衣臨前除稍就池
上酌時曳花間鋤孤情締物妙魚鳥樂有餘即日繕吾
性無事遊皇初

澄江園池眺矚

驚鱗樂深藻倦羽歡重林翱翔既慨昔棲遲方羨今暄

晷發陽澤嘉晝陶春心閒館愜豐豫岑園曠招尋荒亭
俯青嶠遙榭枕碧潯游條綠蒲動喬木佳禽吟徑幽眇
采阻岫古脊登臨苔石滑窘步密篠青縈襟風動池上
樹烟澹天邊岑日色遠林薄雲影空江陰久客契靜旨
展眺空囂忱作者亦以徂游者誰復任孤賞發遙思元
感嗟浮沉

院齋晨起

衆禽散簷隙澹白開遠天僮起掃落木槭槭驚我眠飭
服罷盥濯緩步東廂前仰視風色佳空林歇殘烟塵牘
乏絲務飲食中悠然竹樹動幽影芹藻翻輕漣久勞眷
閑寂欲鼓契無絃忽念農家流食力勞陌阡晏坐拋居
諸何以籌無年無事飽終日此道非聖賢感懷慕往哲

匡坐披陳編

春申君墓懷古

海門雲起日不紅江樓大鼓號顛風老鴉夜笑碧火出
靈颿萬丈沉幽宮薛斑剝蝕斷龜足霜株拳屈穿沙蟲
馬鬣三尺不得見但趨佛座窺潛蹤虛檐古瓦晝暝晦
傳芭難假神巫通啓疆江介并吳服執珪坐擁兼城封
珠履良辰集上客文采照曜江淮東魁綱獨柄閱重紀
顧盼誰足侔尊雄為國本計重嗣續此事豈得居竒功
失期白狀露機械彼鬼蜮技疇能窮以色售人賣骨月
斯輩安可輸誠衷泠泠七絃鼓深夜大事去矣中徒忡

及身得國亦前定婦言奚足搖吾中與人家國計榮利
暨子真不如奴傭啣媒婢妾奪君祚樹蘭拭刃爰書同
幸逃顯僂盜國柄亂臣豈免討與攻長蛇繞足不知死
嗟哉愚乃猶童蒙陰柔蓄險意叵測渠以軟弱藏兵鋒
秉權正位計亦急籌策但可延殮饗彼奚至此棄勿道
與僕善者寧皆忠重墻夾刺布心腹湛盧悔不剗園胸
棘門一擲碧血濺十七日耳何匆匆江流呼洵弔陳蹟
苔砌倚遍蒼髯松張罍待兔俛導虎腸迴往事心惺忪
沙光動盪日墮地僧雛來撞昏天鐘

燕居雜詩

軌運有代謝寒律更平芳春凝霜被蘭畹飛藿零緇塵

幽崖動陽煦肅肅桃李新枯澤何異態衰盛各有辰松
柏豈不嘉特立標霜晨常恐斧斤來亦或摧為薪

太始開萬象日月相乘除嘉辰改寒律奄忽芳歲徂人
事或變易時運何常殊暄風布暖澤元氣回其初飲酒
歌樂康即事歡有餘居人樂新節哲士悲舊塗試看桃
李花猶是前根株

中園有嘉木掩映閒庭陰亦有幽鳥來贈我以好音密
葉如空山復鮮虞羅侵玄冬閔陽澤茲樹何陰森自緣
地氣暖豈為棲微禽微禽偶然得亦復無前心

高樓臨桂樹枝葉胡相樛明月有時上交影橫衾裯涼
颼動虛籟清絕亦可愁坐懷天上香歎息非商秋

晨起坐靜舍初日在我林林鳥暄晴暉啓牖延天光際
此天日嘉擘衣趨東堂東堂有玉琴朱緹雲霞章一彈
生松風再彈來鳳凰鳳凰何嗷嗷松風亦悲涼

芳蘭歇幽谷不芳具芳性豈伊畏霜霰天方布冬令巖
壑迴春榮孤芬動遐聽生本非為人不言亦何病

幽竹何搖搖輕颺偶然度本不縈藤蘿獨立亦何懼鉛
葩炫繁英穠華歇朝暮兔絲凋晚秋弱葛亦難附弗礙
桃李容零露勞相妬日暮天色寒顧影得嘉趣植體亦
已良漂泊非吾慮

青芝生洞房秀色縈衣巾坐無十五絃歎息勞我神菜
蔬雜蘭蒞寂寞長江濱見少識亦難或謂非宜珍日暮

洪崖來來采當芳春作歌叶琴瑟元聲動八垠揮手獻
紫庭瑞儼鳳與麟繁華不爾羨而喜離垢氛

孤鴛翔中塘羽翼何離披沙漠多嚴飈將子游清池暄
波蕩春綠朱華冒輕漪棲息豈弗良抱此無侶悲無侶
亦可休誰復同我饑日月忽已遒逢者知為誰哀鳴懷
故儔日夕長相思

繁陰驚歲暮兀坐中忉忉拔劍出郭門仰視蒼天高平
野連滄波落木聲飄騷清霜明草根野獸呼其曾跋馬
馳高原日澹風颼颼張弦狡兔沒抽矢驚麇逃豈必在
有獲碩瞻聊自豪

鴉鵲行

庭階老松初日照居士梳頭衆雀鬧上枝啞啞老鴉叫
楂楂喜鵲下枝噪喜鵲報喜鴉報憂聞鵲歡喜聞鴉愁
目前憂喜尚未見衆之附和良可羞吉則元吉凶曰悔
厥端並見吾不解喜賞喜鵲憂賞鴉空言悞我惟汝罪
僮僕怒鴉來打鴉鴉遭僕打飛啞啞惡聲不至理亦得
奈何鵲入東鄰家呼僕入室女莫打耳食豈足分町畦
爾不見烏生八九子毛羽長成東西飛中堂有粟顆粒
肥啣來飼烏烏不饑昨夕風搖鵲巢落老鵲尋巢叫小
鵲小鵲高飛散叢薄

大雅堂蒲桃樹歌和陳生

幽庭炎夏清無暑朝陰暮陰黑雲吐橫枝直枝瘦蛟舞
轟霆夜半掀空天陳生下筆驅風雨携棹歸當仲夏初
花霏玉屑裁瓊琚空憶殷鮮薦瑪瑙但縈薜荔編龍鬚
老榦枝撐閱人代苔涎蟠拏謝儕草材大根移博望來
數竒坐等將軍廢我聞孤高百尺龍門桐新甫有柏徂
徕松萬牛迴首移仙闕千厦瞻雲建闕宮此樹礮礪將
毋同陰氣合沓東墻東干盤已布垂穹勢半畝猶施蔭
物功酒酣薄暮虛檐卧紅豆離離綴千箇結實徒療虺
蝮饑作花不救鳳凰餓輪困鬱曲胡為哉陰庭日落悲
風迴但將青蓋垂朱夏不作濃霞鬱綠杯黃麟赤雁收
殊域目斷明堂天馬來

人日園中亭上

入歲動七日天氣陶暄嘉晏坐閒庭空日影忽已過心
靜更無事所獲即此多緩步嬉春陽天暖心氣和亦有
好友生暇日相吟哦携手來空亭藹藹春暉賒晴光迴
綠渚霽景移凋柯黃鳥竹上鳴客至驚婆娑飛飛入叢
薄條各歸其窠我樂爾所樂我豈惟爾羅慨世用機心
遂令真者訛穆然念皇古佇立徒吁嗟

古詩四章喜王琴德過

瑤葩麗雕榭春飈扇宗蘭美人袿服坐瑤瑟聊獨彈朱
絃靜理蘊遠調清徽完音希悶苦意闔戶資幽歡殊響
繁夜叢泠泠曲就殘綜徃兼慮來引領起微歎願折珊
瑚枝持謝知音難

之子亦何好窈窕光容儀落葉朝翩翩手持瓊樹枝翠
璫飾珠珮翔步臨前墀嘘蘭拭洞簫不惜勞空閨明月
來廣除曲斷無人吹含睇稍延佇我顧神為移曲調寧
不嘉白日方西馳努力愛景光崇德為子期

暄風被陽林巖構榮丹葩蘭芷及荃蕙郁郁回春華輕
颺發芳艷孤秀凌朱霞太古忽已遙入耳皆淫哇不悲
元音遠坐患流無涯斯人詣淳古指摘勞相加願製芟
荷衣怡子以清嘉

鳳階企晉諸子

元音逝已久瓦缶空陳陳哀哉枯桐枝俯首同殘薪大
雅出晚世古意陶天真靜參溥悶趣援手扶奔輪沉光
秘元訣和性嘘芳春斯人亦已然此曲何難申咫尺獨

大谷山堂集卷五
緘憶悵望勞嘉辰

謂沈宗伯

大雅堂讌歌

諸公擊節吾其歌有生不樂如生何今我與子髮不皤
霜華有日頭顱多行樂以酒亦從俗偶一中之非刺促
酒熱傷手冷傷唇冷熱相均味已足燈紅酒綠月光白
浮生冉冉君須惜若遇良辰思故鄉子固可嗟我亦客
髯翁短簿皆嘉賓錢郎初至亦可親槎枒透露出芒角
不醉未必肯語人醒眼觀醉醉無狀辭意支離體頽放
若為觀者就拘縛我心如擣何由暢君不見春申君昔
何磊落今無聞劉伶作頌頌酒德死饒狐兔眠荒墳當
其在時豈不樂至今骨朽江之湄世間萬事亦何定慮
在方來今已病吁嗟乎有酒不飲寧非愚君不見眼中
二子今已無

使歸自北得都下信

違都倏兩月節變餘光徂兀坐懷弟昆風雪相與俱陽
鳥悲天寒冰凍河無魚今晨鵲噪檐忽得年前書兄弟
各無事稚子皆安居昔我蓬池游發軔三月餘方春伯
子亡令姊忽已無此別隔年歲親故知何如客久閱世
熟我彌愛我軀逝當力餐食君亦長歡娛

大谷山堂集卷五

門人青浦王昶上海張熙純趙文哲嘉定曹仁虎同訂

華亭門人王鼎恭騰寫

大谷山堂集卷六

建業門人嚴長明編

謝山夢麟文子



夜坐園池

月出臨廣池人影動空碧松際隱清光林罅露微白風
交樹影橫鐘定空園夕念彼前居人悵望知何益墜葉
散青苔時見幽人迹

夜歸西齋

入院聞妙香夜棹澹風砌偃卧開予襟向晚蓬門閉澄
輝明夜窻片月生松際遙見風中枝漸向窻間逝

古詩三章寄錢師

喬柯墜繁露潤逮隴上苗膏澤良自天蔭息終嘗邀春

暄發土脉芳畹滋申枿可憐幽蘭葩寂寞寒江臯寧弗
畏霜雪雨露知非遙逝當愛春暉藉以酬長條

寐士撫清絃仙客調鸞笙玄感發靈籟惜未哀人生夫
子契古道揮絃振天聲靜叶天地撰細齊民物情賡庭
帝有喜被廟神是聽賤子步高律毋乃鷓鷯鳴微吟慕
元化亦復中和平

騷衷如可識伯樂胡見思奮蹕馳橫門彌憶哀鳴時俯
首就凡軌或以惡馬訾哲人見歎息一顧悲吾饑後戎
力健步畏辱君子知浮雲東南來悵望中難持含情睇
天半白日予心悲願奉王喬丹永駐洪崖姿

鳴鷓行

正月廿七怪鷓鳴我房不哭而笑飛且翔強弓硬弩不
乘便譔譔出出吁汝狂人云鬼伯使之促人命或哭或
笑丁者殃驅逐魂魄就泉壤如禽竄網駒隨韁我命在
天豈汝懼但念老奴寢疾恐遂當惡聲到耳轉惆悵我
心憂矣中皇皇後三日夜鳴更急羣若其舊疾者康我
求厥故厯堂廡維庭之柏鷓所藏思以火攻滅其衆烈
燭不到千丈強不則覆巢斫所托巨植坐壞籌非滅巡
檐仰盼倚庭樹厥聲啞啞來空廂羣鷓搏擊負者走且
飛且叫揚其吭我聞則笑彼則哭痛其所痛奔踉蹌疾
病呼叫理亦得豈為聞者徵災祥若緣見少遂多怪彼
鷓之口誰能防方言呪誦亦無謂鷓鷯鷓鷯紛難禳鳳

鳳憇息九重閣聖人敷化垂無疆州十有二國千八峒
獠猺獠氏戎羌雕題鑿齒繡肢體窟伏巖洞時跳梁鳩
形鵠面吁可怪鳩舌奚必皆無良以指喻指執耳食偶
焉值者奚徬徨若巢出巢食母肉弓弩後事無使饒逋
亾

長歌喜徐大快亭至飲酒作

黑風吹海聲如號大江千里無征艘東溟漁人棹船至
君從何處橫輕舸聞吏傳刺我方食投箸而起羹沾袍
積悃蝟集忽相晤如背痒得麻姑搔坐君琉璃四面閣
飲君碧玉千春醪轟飲大嚼盼左右卮融琥珀盤堆螯
青眼高歌望吾子荀橫空空起騷人騷男兒不佩斗大

印便當去作鄉里豪不然肆志憇泉石空庭佳植羅櫺
樛丈夫舉事貴快意譬若鷹鷲離鞬條嗟君簿領膩塵
漬五年作吏東蒙凹科條朝布吏役雜錢賦暮比鞭箠
敲有時大吏出行部前驅負弩馳如猱掃治館舍索酒
食人奴口角饒訾謗挂冠歸無宅五畝出奏歷有途干
遭伯道無兒伯夷餓爰書判斷須咎繇羈留歷下月再
閱叩門弗應吁勞勞酸風夜吼馬毛縮洶波凍合浮艤
膠衣裘破敝行李乏每念及子中焉切心游道塗計月
日飛觴寧敢期今宵嘆君跋涉喜君到咨嗟叫笑兼呼
叟憲紅盞綠燭生蕊鱗鱗碧酒金波搖更籌屢易檐烏
宿戟門搗鼓鼗鼗高開簾起視雪在地霜空片月圓松

梢

襄勤大司馬視師江上走筆作歌

海門百里弭顛風雲飛濤湧天普普旌幢朝閃轟牙纛
大旗獵獵翻青紅騰裝裹甲戒中夜焱興霧塞東城東
後隊材官耀組練顏行猛士驅羆熊榮戟隊盡駐文韜
豁然耳目除矜聳攬袖一笑顧顏色兩顴突兀肌膚豐
離憂鬱結塞腸胃覲面忽乃辭之窮寒暄甫罷促車騎
欲傾私悃須畢公俄聞萬籟起澎湃轟霆飛礮掀高穹
千軍呼洶山動盪七校搏擊濤撞春甲士統弁弁統將
戈鋌矛戟敲金銅指麾初定畫若卦風雲倏變蜷如龍
鏑飛利鏃曳十石塲開千步馳風駿鈎陳玄武燦藻繪

電光霞彩陽輪中登壇黜陟軍吏伏我罪而罪功而功
鞭箠撻伐奮威武師出以律維予宗遣吏攀轅及初暇
東道半日吾能供閒庭曲几列樽榼要須快語抽鋸鋒
飄萍飛藿那可定竭來有似春秋鴻辛未梁郊間言笑
時維九月霜凋楓隔年命价赴歷下瑤華遠寄勞緘封
厥歲秋初作歸計傷哉殄禍丁吾躬郵筒惠我失裁荅
鰥魚夜哭予非慵神昏簿書困酬酢如馬于絡禽于罟
去冬十月辭陛下海崖江汜褰裳逢剛鋒利刃互鏗
擊粗砂巨石相磨礧丈夫立身貴磊落語言容色誰能
工獨開懷抱刈藤葛使君天下真英雄九疑之山百折
阪片言何術開予胸嗟我輪蹄值初息三月又挂淞江

蓬秦淮鼓櫂約長夏薰風正見扶疲癯但願年歲好風
景露雷雨澤恩施隆春作秋成伏螟螣洪河安瀆江湖
同億萬兆姓慶溫飽酣歌鼓腹周黃童二千石各法名
杜橫經負耒游熙雍朋儕結納盡忠厚走忘網罟飛忘
弓我輩殷勤樂晨夕何妨飽喫江南菘嗚呼何妨飽喫
江南菘

院齋絕句

石上蒼苔繡作花戟門鼓靜罷朝衙杖藜翻得山人樣
蠓眼松風學煮茶
杏苞紅吐柳抽黃板屋松檐晝漏長僕本于人無所乞
鶯花色色仗東皇

十日東君放快晴野簫土鼓鬧春耕紙鷲風起江城暖
曳屐空廊聽賣餠
偶一中之聊復爾冷然善也忘其餘閒添鵲腦下簾押
豉足竹林繙道書

春柳四首

羈愁離緒總依依眺遠登高心事違幾樹暮烟吹欲散
一時殘夢喚應非草青陌上王孫去頭白江南燕子歸
好向輪臺自收拾玉關人未著春衣
何處濃春景最酣一鞭晴指漢江南青旗風暖人携棹
板渚波生客駐驂關塞夢中猶裊裊短長亭畔莫參參
朝來淚盡紅橋酒頽影攀條總不堪

杏蕊桃枝相映紅
絲絲晴影畫欄東
隋堤艷舞三春雪
南浦花飛一笛風
至竟客歸芳草外
當年誰在夕陽中
班騅好認章臺路
幾樹依依與昔同
宋苑唐宮蹟已陳
石頭城外可憐春
飄殘笛步留斜影
舞入青溪起斷塵
半樹尚餘司馬歎
一枝可憶灞橋身
游絲絡絮憑誰惜
無限高樓垂手人

春日入西園四十韵

軒窗洞豁凌江潭
君山後矗形耽耽
自冬徂春悵寥寂
愁端羈緒縈春蠶
使院院宇頗幽邃
曲廊靜室疑精藍
梅花繞屋石當戶
西園况許幽人探
玄冬極目但蕭槭
林空木瘦池如泔
西齋枯坐六十日
眼前栢子吾須參

花朝曹騰忽已過
軟風酥雨煩追諳
今晨啓戶燕泥墮
隔簾款語聞呢喃
銅鈺挂樹色妍媚
晴暉著面神醺酣
東閣晝卧屏絲務
芸編蠹簡窮搜婪
野花被碱蜂蝶鬧
春光坐老吾何堪
名園咫尺隔庭院
折嶠淨椀呼僮擔
况有良朋共調笑
陳生王子予而三
啓扉縱目意有觸
綠塘曳履中忘憚
棕皮亭榭竹依檻
黃茅屋子苔為龕
右袒跂足展遐眺
江烟林靄飄虛嵐
圍牆老樹近百本
楸梧檜柏松杉楠
杏苞未坼細於豆
草芽漸茁抽如簪
柳絲潑眼綴輕碧
長條但未垂參參
荒灣角轉樹梢曲
方池影倒春空涵
蘚生磴道漬鮮潤
風交梅萼迴清飜
園林幾日未投足
新恩坐受東皇覃
撥刺游儵冒蘋藻

大谷山堂集卷六
六
薌林迢遞聞優曇耳謀目謀眷烟水心輯心懌忘嗔貪
幽尋結隊愜佳况攬勝何事與編籃人生聰明坐勞苦
風塵奔走拋昆男置身閒地乏紛擾得少佳趣緣吾慙
偏仄毋乃虱處禪岑窈有似僧歸庵讀破萬卷不得意
穿穴何異書中蟬携囊戒僕卧江上子猶淪落予其慙
當風頗憶伯倫頌抵掌時作鄒生談妙語林間發精諦
快辨舌本抽銛鐔天無纖翳豁懷抱茶過七椀餘芳甘
豈必熏蒸飽吞嘍山泉活火勝沉醜澆愁破悶散幽疾
清歌但少聽何戡芳春幾日更東去弭節要過虞山南
歸來約計在秋半美容菊蕊良所耽但恐浮蹤泛萍梗
知復何處停征驂佳境倘能遂留滯曠懷豈為風塵滄

光福楊梅洞庭橘楓間為爾分黃柑

長歌贈陳生宗達

陳生豪氣不可當軀幹雖小筆力强馳騁壁壘厲銜刃
淋漓寶墨花煌煌興酣和我入園作敲鏗憂擊摧琳琅
攻強押險力排冪擲筆呼酒何昂藏翠羽金支互輝映
琪葩瑤草交芬芳積健于骨字出力此見最確非騎牆
口角流沫唾壺缺君為褒得中洋洋十載翱翔歷詞園
流傳派別知頗詳卿雲復旦肇胎胚維風雅頌枝條昌
殿庭郊廟格典重鎔精樹骨恢洪綱妃豨伊那缺完簡
編摩纂集偷邊傍披陳忠孝鑄靈府心聲激蕩寧拋荒
武夫豈曾肄音韵拔山盖世慨以慷述情怡悵洞胸膈

老嫗稚子胥毛叢欲外倫常覓超詣譬以莢稗充倉箱
開元李杜擅標則爛若斗極天中央昌黎後起態稍變
語竒句重森寒芒北地信陽軼前代排擊至弗容遮防
吹癥索瘧置狴犴彼哉無恥愚而狂掀騰萬派湧真氣
輓近奚必皆尋常融情範性企淳古陶韋沿溯招河梁
瓊枝玉樹務雕飾婉麗但可娛嬪媵宗彞雞雖爍精彩
黝然煥發非浮光揮斥八極就繩墨法隨言立堂哉皇
慨自元音日凋喪乃以箏笛淆笙簧春撞鐘鼓叶琴瑟
斯道豈以浮澆將摛揆雲露失真宰華蟲漆繪咸秕糠
濫觴排比學酬酢如人值虎茲其偃鷓鴣斥鷃競鳴聒
遂令終古無鸞鳳歌雲寶鼎笑陳舊嗟哉何至干人盲

歸愚老人沈宗伯浸淫卷軸鋪雲肪采蘭餐菊擷英秀

咀涵齒頰迴甘香軼塵孤往奮仙翮近今豪傑王芥子

與桑改甫來殷曹仁虎鳳喙王鳴盛迄琴德王昶盤拏變滅龍

騰驤生復天矯出流輩勁力搏掬探純鋼重城峻闕恣

去蹂躪當車可笑干蜚蝗黃緣途軌發元感無言文字

超軒黃拈花一笑秘真諦偶然拾得參空王我本無力

追正始千春引領徒相望傷今憶古抱愁疾刺刺不覺

言之長高歌放眼睇天末危樓日落烟蒼茫

園中春色麗甚觸懷為詩

日麗風酣聽鶻鈴閒拖方竹出空庭官人可笑不官樣
轉過松廊都眼青

江干幾日雨如膏紅綻檐牙綠上袍憑謝東皇好風力
吹開三十樹緋桃

可惱顛風吹落梅狂夫三日為花哀清緣却喜不曾斷
墻角玉蘭如手開

香煖烟叢蝴蝶飛輕黃渲染柳芽肥眼前風景好如此
何事王孫不憶歸

點綴底須風日力芳華終荷彼蒼恩閒園三日一携杖
紫艷紅稀是者番

和烟煦日滿方塘綠草晴薰暖翠香山鳥翩翩魚撥刺
個中飛出數鷺鴦

又到嬉春中酒時苔青幽院捲簾遲花前一事關情甚

覆盜門東賣酒旗

芳園佳樹語流鶯春靄春山色色明似酒軟風吹欲卧
天邊又落紙鷲聲

何處看花眼不新花開如意謝花神紅酣綠膩滿腸胃
墨瀋紙光都帶春

挂笏空亭日欲斜林光池影映烏紗黃蜂紫蝶入墻去
一帶綠楊歸晚鴉

獨坐列岫亭懷吳企晉

和氣嘘蘭心芳烟澹空色獨客陶嘉辰荒庭稍游息亭
午花氣濃羣艷競雕飾飛霜亦已遠好景忻初即冬去
春復還展眺情何極竹靜微風知林轉遙岑得日暖君

山谷正集卷之九
九
山南雲去空江北輾轉懷佳人長天獨緘憶

擬陶徵君田居

俯仰樂天地及此芳春時我居既云安我稼行當治屆
節廢耕作筋力毋乃疲安坐祈豐年啼饑嗟何遲夜來
春雨嘉携杖過東菑我苗忽已長好風披拂之今年或
有秋人事毋中衰念彼耦耕人千載良吾師力田屏絲
務乖異無相隨牽衣眷稚子畢景歸怡怡頽然酌醇酒
保此長年期

擬韋蘇州寄友

端居歲云徂密雪灑幽館啓戶夜鐘寒墜葉空堦滿緬
彼車輪遙衣帶至今緩把酒望空江臨風布深歎

出郊

齋居厭局促崇阪披遐觀夜色歇叢薄水竹留輕寒迴
溪帶遙戍芳陌依修巒運轉迓新覲沿紆天宇寬春風
幾日來柔莢被江干波光澹天際野靄浮林端或見荷
鋤人驅犢緣春湍時哉意有觸逝者憂無歡裴徊佇烟
樹仰睇孤飛翰

夢游縹緲峯歌

縹緲峯獨立具區煙靄微茫之當中波鬢浪齒山根空
青天擎出萬歲不老之美容鸞鶴駕來青童輒欲引
去遨元穹蓬萊瀛洲望不到但有碧霞絳氣繚繞神仙
宮酒酣夜卧芙蓉國覓逐江流眺江月震澤三萬六千

頃一片瑠璃遠明滅明滅變沒雲濤是非海若盪槩水
夷解維淼溘遐驚金光倒披舟平浪感波昂岫低羣靈
夜遊金支翠旗玄鶴影落海蚌月開龍威毛公之屬招
搖以並下青蚪素螭愴怛而交迴颿檣風利不得駐送
我直去凌丹梯丹梯轟空幾千丈纔出波心便天上洶
濤激擊山靈驚頽影虛無搖滉瀆玉柱竦峙金庭霧紛
珠斗拂袖玉兔伺人海日倒出雲綿布焚繁星錯彈雪
天拂天闔雲璈琅琅驚潛鱗罡風靈籟虛空聞鈞天夜
奏開重闔天雞仙犬遨遊以鳴叫流飈冉冉便欲扶我
乘飛雲冷然麾袖昇丹輪縈襟拂帶交流零羨門高誓
紛吾賓瑤車馳突嬉清旻鏗鏘虎瑟噓龍唇青霄抗手
辭八垠御空逝與邱崖羣下視玉盤一片墮水底動搖
偃仰如欲沉瀟瀟月落空江卧江野虛檐恍聽飛流瀉
圓嶠方壺本素期曠懷豈為風塵下夢斷仙巖憶列仙
我何為是栖栖者

李伯時畫馬歌

嗚呼人世俗手畫馬直似馬絕地超光一朝假寫真無
能更惡狀八龍夜哭沙邱下李侯畫馬無馬存尺縑颯
還風沙昏眼大如箕氣如海風駿入腕權奇奔筆軒墨
昂龍性出一雪萬代驂騮寬依稀沙苑春風暖斷磧烟
濃草芽短汧渭波融首宿青華清日麗蒲桃晚此時圉

人牧馬出玉埒金柑馳不管脫略拘攣逸態翻騫騰直
與烟霄遠一馬卧崇坂一馬嬉遙岡一馬啣草頰馬韁
低唇就草蹏不昂似聞齒决流沙旁數匹奔泉競馳突
或跂健足神騰驤毛髮精芒出真氣一一紙上森開張
懸知下筆眼如虎房駟無光夜飛雨以身入馬極馬狀
豈惟無馬兼無覩任大何勞奮踔爭姿雄時閱英飈吐
持出中堂滿市驚十萬霜蹄浩無主李侯才傑真人雄
盡搜神駿傳圖中如今即或歎沙汗血之驥難長逢披
圖猶獲瞻其風雲騅感激應與孫陽同不然俗手塗抹
空滿壁照夜奔霄反駕劣欲見乘黃那可得繭足荒臺
哭馬骨

馬伏波銅鼓歌為吳企晉作

土龍鼓腹踔腥風波羅大鼓來吳淞叢叢叢鞞辨跟肘
虎雌駁蝕丹砂紅金鉦絝就磨滅馬式僵卧銅駝東

街名在洛陽漢東都

儀帛丁謝不可識誰摹駱越留炎封蛟涎浸積

歎黃霧陰堂夜挂蠻天虹歸雲老塢一懷古今我矯首
心怔忡朱鷺九真肆蹂躪書夜出明光宮樓船戈船
轟幢蓋鈴轅朝播奔豐隆朱旗彤甲蔽蠻日雷門殷起
天懵懵都麓冷縣一朝盡逆後珠浦趨無功西子龍編
建郭郭秋高賽鼓銷寒烽銘功瘞土讐犛獠天留銅柱
標鴻濛擊牛醮酒勞將卒當杯數語何從容賈胡珠貝
議蠶起床前豎子悲梁松眼中突兀那有此土花毒潦

精輝融豈假金銀扣釵釧似有蜃氣蒸穹窿金蛇喻欵
蟠電母飛撾菴獵趣雷公兵光晝動海日沒招魂欲倩
巫咸通城西馬草沒榛莽物猶如此憐蓬蹤吳郎對之
忘殮饗二十八宿羅心胸錦衣花帽揮蜀桐援枹對客
賡三終酒酣奮臂聲逢逢盲飈髣髴迴巴實陰氛合沓
居風濃都羊詩索奔倥侗爲飛跼跼炎烟衝雕戈雪劍
相撞春谿蠻峒虜驚頑聾砰訇豈僅聞干弓變皮百萬
翻蒼穹掉臂誰敢偏師攻便當裹甲西從戎霹靂應手
馳諸兇餓鴟夜叫砂翻蓬飛騰突過曹景宗銅鉦曉挂
雲瞳朧四十萬鼓風齶齶提桴作氣飛黃驄手擒冒頓
朝真龍孤塗闕氏殲厥從龍庭墟落無堅墉歸來盤舞
奏瞽矇穹廬粵嶠將毋同鎔金肖石陳辟雍運與此鼓
傳無窮千秋誰辨風雌雄郎乎男兒安得窮年牀第酣
肥醲澤車欵段無春冬不如此物真鴛庸扣鐔運按橫
磨鋒嗚呼是翁今不逢擲筆一笑驚軒鴻罪言脫口嗟
忽忽報衙火急撾籠銅

江城雜詩

一笑看天地高樓眼獨青室家仍泛濫風雨接滄溟稱
意憐蝴蝶衝愁聽鶴鷄親知襍生死蹤跡况飄零
逕僻兼多病江干好閉門雨沉蛛網黑雲重海天昏坐
失芳春色頻驚獨客魂寒暄真不定三月敝裘溫
前月好天氣閒園欵病夫孤亭一以眺春色滿平蕪草

大谷山堂集卷六
三
綠空江暖雲開斷岫孤
雨風太無賴
悵望海東隅
修竹勞相伴
空堂報雨來
開窓閒對石
曳屐滑憎苔
作
官嗟成客
吟詩惜費才
異鄉兼異節
孤士迥興哀

荒園

密雨沾筠叢
清響亂簷滴
積蘚昏庭陰
茲焉眷閒寂
選樹聞交禽
流颺颺殘籥
惆悵荒園花
春去何人摘

園東小樓眺矚

久雨厭局促
初晴意可樂
西齋飯已罷
聊上池邊閣
稍歷荒堦苔
獨對青山郭
遠風移片雲
午日明紅藥
景光自古來
前人誰可作

登舟將赴梁谿道間作

澹靄蒙青岑
孤蓬冒疎雨
層波生淺涼
獨坐聞柔艣
溪迴移遠林
纜動驚棲羽
微辨墟上村
漸咽烟中鼓
出慣離翻難
客獨意增楚
匪緣逝者悲
誰識生人苦
稍與前渡辭
寒帷睇寒渚
江城忽已遙
孤情眷兒女

舟過虎阜展眺西南諸山

炊烟明晚墟
落日在孤塔
輕舸沿山塘
松暎荒邱合
芳莢暖修矚
暮色生空閣
長天澄夕暉
巖岫層霏雜
因風辨靈巖
靄靄嵐光匝
鄧尉迄天平
晚雲互吐納
何年携枯藤
烹泉坐寒衲
流眺舒微吟
遥艇漁謳答

登樓望玉峯山寺

塵牘昏清牕
兼旬坐廳舍
殘旭媚重構
瞻矚及初暝
寒

大石山堂集卷六
惟啓層寮晚食閒庭罷檐光俯際巒孤翠遙窺榭魏闕
峩青峰綠樹濃崇架磴轉辨遙紆塗迴生遠訝澄霏林
外橫歸羽天邊下觸境無故忱展懷愜新迂良苗披微
風悠然念耕稼眷言思向平何時畢昏嫁

吳淞泛舟遂抵雲間

日上九峰道風輕三泖間流水澹無極白雲時出山緣
念浮家客高風不可攀支頤聽漁唱孤艇放歌還

雲間使院怪松歌

蒼稜鬱律松非松狂奔陡折蟠老龍鱗斑剝蝕蠹爪角
支持傲骨撐青穹霜柯貼地不盈尺掉頭東上根沒石
幾載看辭斤斧危終身幸作支離客陰庭森颯濃氛黑

斷根浸漬青銅色元氣知從半樹迴孤標未放全軀直
驚湍急峽翻空庭喧逐白晝奔羣精却怪滿城雷霆風
雨肆轟激翻與鐵幹爭砢訇黃蓋峰巔昔駐馬漢之三
柏巖之下不惟材大態本竒坐看萬樹無瀟灑此松偃
蹇亦其徒天矯不受方隅拘獨橫黛色參天格留作玄
都道士圖鎖闥日暮陰飈多海風吹斷空墻蘿庭陰畢
歲無客到標格誰憐夜嘯歌石欄暝色竄蒼鼠孫枝埋
迳穿青螺松乎松乎汝何不擇萬人屬目之地膠條柯
此間何異深巖阿不如寒澗結體伴泉石青鸞立鶴猶
得時經過如今豈乏求材選勝之客窮蒐羅汝無其具
應蹉跎人不汝遇徒吁嗟下階倚石三摩抄松乎松乎

如汝何

叢桂堂玲瓏石歌雲間使院作

蒼巒拔地雲根湧晴翻濃翠虛堂動蛟龍奔突庭晝昏
石髮松毛鬱森竦我昔愛山緣愛畫粗皴濃抹差識荆
關派我今對石渾對山恍疑置身洞庭縹緲之峯間鏡
鑿何年厲天斧荒唐古貌如見畸人袒肩山頭佇朝雲
暮雲幾載穿破仇池峰坐使透漏天光萬萬古昨夜疾
雨飛海東懸崖急溜噴平玲瓏凌晨濕翠撲雙闔踈簾
清簾三日青濛濛紫閣之峰靈鷲石目斷孤標矗天碧
愛而不見心忡忡日暮桐陰空岸幘枉憶驂鸞駕鶴蹤
翻憐布襪青鞵客當年舁置此地應煩迴萬牛巉巖特
立無春秋高寒不讓仙人掌孤清合載鬱林舟龍髯虎
耳冑藤葛碧藍紫綠坐閱童山羞苔階酌酒拜石背硯
礪如公復幾輩

古詩二章示王祖錫張榮時趙損之兼寄曹來殷

微尚澹利祿於物無營求自受 天子知終歲懷百憂
豈繫小人戚所懼業不修逐物昧真宰此道君子羞况
復炫珍貝決擇披琳球取人於吐納焉敢狗末流慨世
敝俗學斥鷃鳴啁啾鈞天奏廣闕俗耳嫉若讐千百多
庸庸汎濫將焉休生等各矯健古籍資冥搜浮囂淨洗
滌孤榦標清秋縱目閱流輩卓立非常儔惟聖有弗及
就将恢遠猷豈曰茲談談中道而逗遛神駒立西極遠

到須驂騑騰蹴非無期毋以鹽車愁

鳳凰耀丹苞元鶴翔素雲隱見雖異態厥性皆至純蘭
蕙豈不嘉蕭艾清厥芬孤情勵芳德誰不於彼珍孫陽
瞻駮駟當塗駭精神不如伏阜下猶得歲其身庸人羨
榮寵得之則欣欣不知負荷難十倍於常倫况彼衆女
妬謠譟工笑顰細行露微罅排擊生衆絲庸流或幸免
不怨非常人滌慮歸至潔實主名則賓白鷺寧不白腥
羶啄游鱗努力最崇德以全吾本真

晚發雲間舟過天馬峰下

趣塗豁澄霽纖翠沉空林沿紆信歸櫂向背迷孤岑山
光暎流水清暉閑我心紺壁絢餘綺夕曜明沙禽暝色

下天際忽忽來青潯彷彿聞疎鐘烟外僧樓深迴合邁
田舍烟火桑柘陰稍喜絲務釋復鮮浮埃侵即物覲真
宰忘我得超尋因風發長喟孤懷維道欽

夜過青浦

理棹投暮烟餘暉黯遙巘輕舸尋歸汎空波肆怡衍野
風送香氣皓露滴微泣重疊林景昏微茫峰色淺遠火
辨孤城隔岬聞亂犬稍別烟墟移漸覲雉堞轉華月澹
始照流雲蔚初展一與清景俱乍喜塵踪遣怡悵懷前
蹤餘風動深緬

暮抵鹿城舟中展眺

長川澹歸汎落日到山縣稍與孤塔轉頗逐微颺便展

眺城上山竹柏皆可見蒼崖返照明紺宇殘霏絢是時
澄晚暘禾黍麗芳甸交風被修阪草樹豁葱蒨歸雲峰
勢引夕麗林暉散天迴飛翰遲鳥動新叢亂擊汰凌扁
舟遙吟締深眷

婁門放舟將泊胥口

泛舸緣龜城威紆豁吾性清流浮雉堞趨塗得嘉徑岍
斷蒲影分川迴霄光暎漸轉南城均遂獲西山勝烟平
遠樹兼雲動千峰并清塘數燕斜遙天一帆正杳靄辨
虛舟披覽迓新靚緬懷澄湖蹤漂泊寧云病

食鄂少傅所餉鮮荔枝作歌

南村北村斗指庚盧龍玉乳傳空名大食霜瓢不可購
松棚燥渴嗟無水矧乃角藝坐炎晝蠻觸突起胸中兵
苦無沆瀣潤芒角黃香誰擘金丸橙戟門撾鼓食指動
珊瑚萬顆擎金罌曲榼失喜屐齒折似病酒得銀絲羹
冰盤凹凸瑪瑙碎玉瓶錯落珍珠頰輕紅嫩白暎烏几
纍纍絳簇周天星獨舉玉蕊擘丹實甘鮮底事團黃晶
廉州龍眼作奴隸清芬謾擬鷄頭兄此中無物聊復爾
鼓腹何事愁膨脝充腸恨不啖三百瓊漿未許療饑信
天秘竒種植嶺嶠入耳厭飫貪先聲薦新採異厯閩海
雕盤丹顆留芳馨楓亭五月枝綴錦露華高擷仙人掌
何日支笻鐵船頂倒披青葉筠籠盛至竟傾城艷談塵
豪奢終古吁華清楊梅盧橘不足道紅塵飛鞚隨風旌

延秋門上夜烏叫麥飯誰為陳元正昭陵石馬汗流血
灤西野老悲朱櫻流連珍物動深喟峻嶒五嶽當胸生
未能免俗溺尤物龍團試與髯仙評蔗漿更酌消內熱
涼颼拂拂吹桃笙

胥門伍胥祠

伍相祠堂鎖寂寥層城終古對江潮雲旗風馬當宵見
畫壁虛檐入夜遙舌劍至今尤宰嚅魚腸何事悞王僚
寄孥鞭墓寒心甚日落關門聽野簫

舟過惠山

歸舟愴無極偶與名山邁松蘿媚雲日爛若簇朝繡苔
髮紆遙青巘崿鬱深秀頗似春空佳遂飫烟霞富冷風
交遠樹微靄下層岫虛籟生蕭林繁陰肅清晝沿洄眺
杳藹境轉孤帆就依微辨蓮宇清泉注寒竇何當憇石
房携筇彈窮究

夜赴澄江

川涂屢回驚輾轉眺明月微颺生斷崖清響散林樾竹
香深夜聞波靜舟人歇鷄鳴知近喧遠寺微鐘發

題姜香巖梅冊

涼月散清影暗香沉孤榭微風動遙枝稍向空櫺下黯
黯相思人迢迢坐良夜

歸憇澄江與諸子重過西園作

游巡踰兩月夢寐懷西園豈緣眷佚逸念彼草木繁華

滋茂時育柯條荷天恩或恐羣兒頑嬉戲傷其根戕折
拂生意何以還初元歸來稍游歷觸目無故存籬落被
新卉芳蕤散雞豚榆柳蔽茅舍衆綠忽以蕃院靜人響
絕林莽惟鳥喧虛亭納野色亂蟲鳴近昏好風東南來
坐閱衣袖翻晚林吐新靄池沼留清痕百物各安好吾
徒道自尊况有好友生相對無俗言悠然滌塵慮暫喜
超籠樊

登君山元武閣瞻矚江野

孤高閱鳥背傑閣危峰崿陰厓挿飛楠洞戶凌風焱大
江西北來觸壁閣動搖無風波浪湧連山奔崩濤北岸
辨高塔微樹浮烟霄東下何茫茫奔突無昏朝海門僅
咫尺一綫烟痕高恍惚金銀臺凌空排丹寮欲歛納大
漠九點分鎬毫落日江流黃天澹風蕭騷驚鷺間鷓鴣
萬籟鳴喧嘈浮雲逐陽鳥朔氣盤霜鷗西望松寥山麾
手如可招引領叫閭闔警欬驚鼉鼉哀哉春申君遺恨
征波遙杜劉豈不達地下誰能逃何當憇方丈海上浮
烟舫

大谷山堂集卷六

門人青浦王昶上海張熙純趙文哲嘉定曹仁虎同訂

華亭門人王鼎恭騰寫



程